



Inatsisartunut ilaasortaq,
Kim Kielsen, Siumut
Maani/

§ 37 naapertorlugu aalisariutit pillugit apeqqummut nr. 2022-34-mut akissut

Inatsisartut Suleriaasianni § 37, imm. 1 naapertorlugu aalisarnermi angallateeqqat pillugit Naalakkersuisunut apeqquteqarputit. Apeqqut suliassaqaqfigisannit akineqartussanngorlugu innersuunneqarpoq.

1. Aalisariutit angallatit 9 meter ataallugu takissusillit nunatsinni nalunaarsorneqarsimasut qassiuppat?

Akissut: 2021-mi angallatit 109-t 6 meterit aamma 9 meterit akornanni takissusillit tunitsivinnut tunisisarsimapput.

a. Taakkunanga qassit kvotenik pigisaqarpat?

Akissut: Angallatit tamakku ilarpassui ataatsimoortumik pisassiissutinit aalisarsinnaanermut akuersissut atorlugu aalisarput, aamma angallatit 6 meterit sinnerlugit takissusillit pisassiissutaatillit ukiullu tamaasa pisassiissutinik tunineqartartut aqutsiveqarfinni Qeqertarsuup Tunuani, Uummannami Upernavimmilu taamaallaat qalerallinniarput. 2021-mi sumiiffimmi 47-mi qalerallinnik tunisisoqartarpoq angallatillu 77-t 6 aamma 9 meterit akornanni takissusillit tunisisarsimapput.

b. Kgotet katillugit qanoq annertussuseqarpat?

Akissut: Angallatit 77-iusut 6 meterit aamma 9 meterit akornanni takissusillit sumiiffimmi 47-mi katillugit 2.551.212 kg qalerallitassiissutaateqarput. Tamatuma saniatigut akuersissutaateqarunik ataatsimoortumik saarullitassiissutinit 20.000 tonsiusunit aamma nipisat suaannik 1.228 tonsinik aalisarsinnaapput. Taamaattoorli sumiiffimmi 47-mi angallatit pingaarnermik qalerallinniarnerusarput.

c. Ukiuni kingullerni tallimani pisassiissutit qanoq aningaasatigut kaaviiartitsissutigineqarpat?

Akissut: Matuma ataani takussutissiami sinerissap qanittua takkerlugu piffissami 2017-21-mi artinut assigiinngitsunut agguataarlugit tunisat nalingat takutinneqarput. Nalinginut tapit, tapiissutit pisortanillu tapiinerit ilanngunneqanngillat.

Arti	2017	2018	2019	2020	2021
Raajat	320	330	397	385	340
Qalerallit	464	525	590	542	547
Saarullit	154	120	126	101	63
Saattuut	46	67	72	57	68

Nipisat	33	41	42	46	23
Aalisakkat allat	4	4	7	6	6
	1.021	1.087	1.234	1.137	1.047

2. Aalisarnermut pisinnaatitsissutit massakut atuuttut takinerpaaffissaata 6 meterimiit 9 meterimut takissusilinnut nuutsinneqassappata, suut allaffissornikkut aningaasaqarnikkullu malitsigissagaat naalakkersuisut naatsersuutigaat?

Akissut: Aningaasaqarnikkut kingunerisassaannik tamakkiisumik misissueqqissaarisooqarsinnaasimangilaq, tassami suliniutit annertooujussuit misissoqqissaarniaraanni siviisuumik suliarisariaqarmata sulisorpassuarnillu pisariaqartitsissammata.

3. Taama allannguisoqassappat, suut pitsaaqutaanersut ajoqqutaanersullu naalakkersuisut naatsersuutigaat?

Akissut: Innersuussutigineqarpoq *"Inuussutissarsiutigalugu aalisarnikkut angallateeqqanik kvoteqartussanik minnerpaaffiliinissami takissuseq 9 meter aallaavigalugu pitsaaqutinik ajoqutinillu nassuiaateqaqqullugit ukiuni 12 ikaarsaariafeqartillugit Inatsisartunut nassuiaat."*

4. Naalakkersuisut Inatsisartut ukioq 2020-imi upernaakkut ataatsimiinnerminni immikkoortoq 28-imut aalajangigaat piviusunngortissallugu pilersaarutigat?

a. Taamaassimappat, qaqugumut pilersaarutaava?

b. Taamaassimangippat, suut tunngavigalugit suliaq unitsinneqarpa?

Akissut: Immikkoortup qulequtaa tassaavoq: Inuussutissarsiutigalugu aalisarnikkut angallateeqqanik pisassinneqartussanik minnerpaaffiliinissami takissuseq 9 meter aallaavigalugu pitsaaqutinik ajoqutinillu nassuiaateqaqqullugit ukiuni aqqaneq-marlunni ikaarsaariafeqartillugit Naalakkersuisut nalunaarusioqqullugit peqquneqarnissaanik Inatsisartut aalajangiiffisassaattut siunnersuut. Naalakkersuisut nassuiaat Inatsisartunut tunniutereerpaat taamaallunilu Inatsisartut aalajangiinerat malinneqarpoq.

5. Naalakkersuisut qulaani pineqartut pillugit allanik paasissutissaateqarpat?

Akissut: Naamik.

Inussiarnersumik inuulluaqqusillunga

Aqqaluq B. Egede

Aalisarnermut Piniarnermullu Naalakkersuisoq